



Komunikadu Imprensa

20 Juñu 2024

Nomeasaun Komisáriu foun CAC iha poténsia viola artigu 8 pontu 2 Lei Nú. 8/2009 ne'ebé ezije kandidatu tenke personalidade independente

Nomeasaun Komisáriu foun “Comissário da Comissão Anti-Corrupção” (CAC) potencialmente viola gravemente artigu 8 pontu 2 Lei Nú. 8/2009 kona-ba rekizitu sira elejibilidade ba Komisáriu nian ne'ebé rekere katak “**kandidatu ba Komisáriu tenke rekoñesidu ninia independénsia no imparcialidade ne'ebé ho nivel aas.**”

Iha 12 Juñu 2024, Konsellu Ministru delibera liuhosi Rezulusaun Konsellu Ministru hodi nomea Sr. Rui Pereira nu'udar Komisáriu CAC ho mandatu tinan haat (4) hahú hosi 2024-2027.

Prosesu ne'e nu'udar faze ida-ne'ebé importante tebes desde períodu Komisáriu iha mandatu datoluk nian ne'ebé termina iha 24 Janeiru 2023 ka tinan ida ho balun liuba kotuk. Polémika no mós fallansu atu nomea kandidatura ba kargu ne'e hahú kedas iha Governu anteriór to'o Governu atuál, husik hela vagatura (*kevakuman*) ida-ne'ebé atraza tinan ida resin iha istória nomeasaun ba kargu Komisáriu CAC nian.

Polémika ne'e rezulta Lei Nú. 8/2009 kona-ba CAC tenke sofre alterasaun tanba pratikamente iha difikuldade no dezafiu iha Parlamentu Nasionál (PN) hodi reuni rekizitu mínimu deputadu 49 ka ($\frac{3}{4}$) hosi deputadu 65 atu bele priense kórum ba plenáriu atu halo deliberaun. Tanba ne'e, PN altera lei referidu hodi fasilita prosesu eleisaun ba Komisáriu CAC nian ho Lei Nú. 1/2024 ne'ebé nia objetivu atu elimina rekizitu mínimu deputadu 49 ka ($\frac{3}{4}$) hosi deputadu efetivu sira ba maioria absoluta atu bele realiza plenáriu nu'udar prevee iha artigu 7 lei referidu.

Hafoin artigu ne'e altera tiha, Konsellu Ministru nomea filafali kandidatu Dr. Rui Pereira ne'ebé antes ne'e hetan rejeisaun hosi PN. Embora laiha esplikasaun klaru tanbasá partidu opozisaun sira rejeita kandidatu ne'e, maibé fontes kredivel sira informa katak rejeisaun ne'e relasiona ho kandidatu ne'ebé agora dadaun Governu nomea fali nu'udar kuadru ativu partidu ne'ebé agora kaer ukun.

“Ida-ne’e kestaun sériu no grave; dala-ida tan, Governu no PN falla atu kumpri obrigasaun tuir lei. Se informasaun kona-ba afiliasaun partidária Komisáriu CAC nian ne’e nu’udar faktu ida, ne’e signifika ita sei la bele mehi dook liu atu haree mudansa ba esforsu sira hodi prevene no kombate korrupsaun iha futuru”, dehan Sra. Ana Paula Marçal, Diretora Ezekutiva JSMP.

Atu evita no hamenus intervensaun polítika iha prosesu nomeasaun ba Komisáriu CAC nian ne’e, iha JSMP nia paraser sira antes, rekomenda ba Governu atu loke uluk konkursu públiku ba kandidatura ba Komisáriu CAC nian, nune’e, bele hili timoroan ne’ebé iha méritu, kualifikasaun, kapasidade no liuliu prienxe rekezitu legál sira, molok apresenta ba hetan lejitimidade iha PN.

JSMP konsiente katak ezijente no urjente duni atu hetan figura ne’ebé iha tempu badak bele fila ba CAC hodi asegura funsionamentu normál tuir kompeténsia ne’ebé lei haruka. Maibé, JSMP ezije atu prosesu sira ne’e tenke tuir lei no mekanizmu ne’ebé hamenus intervensaun polítika. Bainhira prosesu no rekizitu sira administrativa mak la tuir ona lei ka intensionalmente viola rekizitu mandatóriu sira ne’ebé lei rekere, ne’e mensajem ida klaru katak kompromisu atu prevene no kombate korrupsaun nu’udar retórika no promesa polítika de’it.

“Nu’udar órgaun lejisladór, deputadu sira iha PN tenke iha kapasidade atu identifika, verifika no **ezamina** provizaun no ezijénsia hosi diploma legál sira ne’ebé introdús hodi regula funsionamentu órgaun estadu sira no asegura kumprimentu ida rigór ba rekizitu legál sira”, afirma Sra. Ana Paula Marçal.

Iha artigu 8 pontu 2 Lei Nú. 8/2019 ne’ebé altera ho Lei Nú.1/2024, kontinua mantein rekizitu elejibilidade ne’ebé énfaze katak kandidatu ba Komisáriu tenke independente no imparsiál. Ne’e signifika katak kandidatu ba Komisáriu CAC ne’e tenke totalmente livre hosi afiliasaun partidária ka asosiadu ho partidu polítika ruma no iha méritu profisionál. Prátika di’ak internasionál sira sujere katak bainhira Komisáriu ne’ebé lidera órgaun independente ida hanesan CAC mak asosiadu ho partidu ruma sei implika;

1. Komisaun Anti-Korrupsaun sei lakon nia kapasidade/autoridade no natureza independénsia tanba sei simu diresaun/orden hosi lider polítiku sira ne’ebé kaer ukun;
2. Komisaun sei sai fali instrumentu no ajente Estadu hodi halo fali estorsaun (*pemerasan*) no korrupsaun.

Tanba ne’e, *trend* ka tendénsia evolusaun prátika progresiva sira kona-ba prosesu selesaun no nomeasaun Komisáriu CAC tenke asegura prinsípiu sira hanesan independénsia, imparsialidade, neutralidade, integridade no apartidaria ka la asosiadu ho partidu polítiku ruma.

PN tenke hatene katak CAC nu'udar órgaun polisiál espesializada ne'ebé simu knaar atu prevene no kombate korrupsaun. Iha ámbitu ida-ne'e, CAC goja ninia personalidade juridika nu'udar órgaun polisial espesializada ne'ebé independente iha ninia knaar kombate korrupsaun hanesan define iha artigu 3 pontu 2 kona-ba natureza CAC nian.

Bainhira prosesu nomeasaun mak hatudu faktu klaru kona-ba prinsípiu hirak iha leten, naturalmente sei implika papél no atuasaun CAC nian iha terrenu.

Konsidera katak elementu no natureza independente no imparcialidade nu'udar aspetu krítiku dezempeñu no performa Komisáriu CAC nian, no ba interese atu hakotu no dúvida públiku kona-ba kandidatu atuál, JSMP rekomenda no ezije ba PN:

1. Governu atu loke konkursu públiku ida ba kandidatura Komisáriu CAC nian hodi halo rekrutamentu tuir rekezitu legál sira atu bele hili timoroan ne'ebé iha méritu, kualifikasaun no kapasidade atu bele apresenta ba iha PN hodi hetan lejitimidade liuhosi votasaun iha plenária.
2. Se Komisáriu ne'ebé liu konkursu ne'e pratikamente envolve iha partidu polítika ruma, PN tenke estabelese mekanizmu própriu ida hodi ezije Komisáriu ne'e deklara publikamente iha plenária PN katak Komisáriu ne'e tenke hakotu nia relasaun ho partidu ne'ebé kandidatu ne'e partense ka asociadu ba;
3. Asegura atu halo balansu Komisáriu CAC ninia lideransa durante asume mandatu, nomeasaun ba Komisaáriu-Adjuntu sira tenke iha representasaun hosi ema profisionál no independente ne'ebé laiha relasaun ho partidu ruma;
4. Ba partidu opozisaun sira atu bele analiza no ezamina rekizitu elejibilidade nomeasaun ne'e ninia poténsia violasaun ba artigu 8 Lei nú. 8/2009 ne'ebé altera ho Lei Nú.1/2024 atu husu fiskalizaun abstrata ba Tribunál Rekursu/Tribunál Supremu Justisa;
5. Ba públiku iha jerál atu ativamente halo akompañamentu ba prestasaun servisu no produtividade Komisáriu designadu durante tinan dahuluk mandatu nian no sei la hatudu indikasaun progresu pozitivu ruma – bele explora mekanizmu sira ne'ebé lei garante atu apresenta petisaun ba orgaun soberanu sira tuir Lei Nú. 2/2024 kona-ba Direitu Ezersísio Petisaun nian.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl

@pengikut@sorotan